

Leev Lück, he in dä Kirch und doheem,
jetz hann mir ald vür däm Äschermittwoch dä Rän,
denn dä Putin is einfach su met Jewalt in de Ukraine eren.

Do könnt mr singe „*Wie sull dat nur wigger jonn?*“
Noher hann mir dä Jeck noch he vür dä Dür stonn.

Ävver im Erzbistum sin mir och nit besser dran,
denn dä Woelki fäng am Äschermittwoch widder an.

Obwohl dat Evanjelium von hüg dozo pass,
mach ich mir un üch dodrus keine Spass.

Leever dät ich jän ens drop luure,
wat dat bedügg für uns all un net nur für die Buure.

Eijentlich däten mir jo jetz Fasteloovend fiere,
öm dann in dä Fastezig reumütig inzokiere.

Do hätten mir dann in dä Sitzunge däm eine oder andere mit Humor die Levite jellese,
domit dä insit, dat dat wat hä jemat hät jrusse Driss is gewesse.

Doch sick zwei Johr han mir die Pandemie
un all stöhnen „*Annemie ich kann nit mieh*“.

Mir luuren nur noch drop, wat die andere – von Wielers RKI bis zum Lauterbach -
net richtig maache,
un meinen mir hätten jar nix mieh zo laache.
Övver de Impfpflicht räjen se sich im Moment all op,
fahren mim Auto oder Motorrad zo Demonstratione, schnallen sich ahn und dunn dä
Hälem op dä Kopp drop.

Do lossen se sich et Räch op Freiheit inschränke,
ävver beim Virus dunn se net an die andere denke.

Ich wör jedenfalls ald längs nit mieh am levve,
dät et beim Mopedfahre die Hälempflicht nit jevve.

Doch könnt mr dat Evanjelium von hüg och ens kabarettistisch lesse.
Un zwar mit dä Froch: häst Du dä Dreck am eijene Stecke verjesse?

Keiner von uns is ene Hillije,
doröm müsse mir och dä andere Fähler zubillije.

Ob et nit och e paar Düvel unger uns jit,

dat weiß ich mit Bestimmtheit nit.

Dat will net nur in dä Kirch keiner wirklich wisse,
doröm denn se sich all verpisse.

Für mich is et do eklatant,
dat mir für Missbrauch im Platt kein Wörtche hann.

Ejal, ob in dä Familich, dä Kirch oder im Sportverein,
mir sinn uns do einich – nä, „bei uns kann das nicht sein“.
Die Missbrauchstudie zeijen et ävver janz kloor,
un su wieh et och deiht, dat is einfach woohr.

Do widd doch jedem janz kloor, bei all däm Driss,
dat dat ene Systemfähler is.

Die Pastürche dun die Lück zum bichte verpflichte,
und im jliche Moment dun se über die Lück richte.

Als Pänz wurdten mir et Kamellelötsche in dä Fastezig,
mit enem Rusekranz quitt.

Für die Jruße jov et für et Fremdjonn jet mieh.
Ich sach nur „*Annemie, ich kann nit mieh*“.

Ävver – jetz widd et jo kloor,
dat dä Baleke im eijene Aug wohl jet jrüßer woor.

Leev Lück, dat is net nur e Problem bei uns in dä Kirch vun Kölle,
sondern üvverall do, wo Minsche zosamme levve.

Un dat in Systeme un Strukture besonders dann,
wenn e paar meinen, dat sie üvver andere zo sage hann.

Dä Putin hät jo eijentlich nur Schiss,
weil in dä Ukraine en Demokratie am waasse is.

Dä verjrief sich an dä Kleine,
un deit meine.
Ihm köm keiner op die Schlich,
jetz hann se ihn ävver erwisch.

Dat kost Minsche dat Levve.
Deswejen ist et jetz och jood zu bedde.

Joot – mr könnt jetz drum bedde dat dä Kreech ophürt oder dä Missbrauch

Ävver do stonn mir jo bekanntlich om Schlauch.

Bedde künnten mir doröm, dat mir e Näsje dofür krieje,
wo mir selevs dä Strukture erlieje.

Dat mir merken, do werd ich vür ene Karre jespant,
vun däm ich sach, dat ich domit nix zo dunn hann.

Un dann mööt ich och noch dä Moot hann, dat zu sa(r)ge,
denn dann künnten et och noch andere wa(r)ge.

Leev Lück, do künnt mr meine dann,
dat mir diss Johr wirklich nix zo laache hann.

Doröm möch ich jän an dat erinnere, wat der Paulus dä Korinthere jesat hät
Jot, dat reimt sich jetz net.

*„Gott aber sei Dank, der uns den Sieg geschenkt hat durch Jesus Christus, unseren
Herrn“.*

Dä Herrjott is für uns am Krütz jesterve
Un deswäjen mach ich mir kein Sorje für morje.

Mit singem Duud am Krütz hät hä däm Duud dä Stachel jetrocke
Un doröm kann sich jeder, dä mit dem Levve vun Minsche spellt nur verzocke.

Duud, du kanns mir ens dä Nache deue!
Vom Herrjott her, kann ich mich am Levve freue.

Un do künnt mr et tatsächlich ens waare,
däm Duud un singer Handlanger Angs zo maache.

Ich erinnere mich doran, dat minge Opa uns Pänz am Nikolaus-Ovend Angs jemaht
hät,
indäm er mit Kette vum Baujerüst an et Huus schlage dät.

Dat hät net vill jebbruch und mir hann et russjekrächt
Un uns am Opa – dä hät et jo nur joot jemeint – jeräch.

Do sinn mir Pänz dann selevs mit dä Kette öm et Huus jefääch un hann dran je-
schlage.
Dat jing däm Opa dann doch op dä Maage.

Do wor dann Schluss mit dämm Spell.
Denn dat Hüsje hat dä Opa jekost zimmlich vill.

Einfach alles römmdriehe on ömkiehre,
su dunn mir normal Fasteloovend fiere.

Un genau dat mööten mir jetz och donn
un jäjen all dä Blödsinn mit Humor opstonn

Duud, du kanns mir ens dä Nache deue!
Un desjwäjen dunn ich mich am Levve freue! Amen.